



PARLAMENT DE CATALUNYA

Resolució 5/X deth Parlament de Catalonha, pera quau s'apròve era Declaracion de sobeiranetat e deth dret a decidir deth pòble de Catalonha

Tram. 250-00059/10 e 250-00060/10

Plen deth Parlament

Eth Plen deth Parlament, ena session deth 23 de gèr de 2013, a debatut eth tèxte dera Prepausa de resolució de declaracion de sobeiranetat deth pòble catalan (tram. 250-00058/10), presentada peth Grop Mixte (reg. 856), e es esmendaments presentats peth Grop Parlamentari deth Partit Popular de Catalunya (reg. 1010); dera Prepausa de resolució de declaracion sus era sobeiranetat e eth dret a decidir deth pòble de Catalonha (tram. 250-00059/10), presentada peth Grop Parlamentari d'Iniciativa per Catalunya Verds - Esquerra Unida i Alternativa (reg. 857), e es esmendaments presentats peth Grop Parlamentari deth Partit Popular de Catalunya (reg. 1010) e peth Grop Parlamentari de Convergència i Unió, eth Grop Parlamentari d'Esquerra Republicana de Catalunya e eth Grop Parlamentari d'Iniciativa per Catalunya Verds - Esquerra Unida i Alternativa (reg. 1011); dera Prepausa de resolució d'aprobacion dera declaracion de sobeiranetat e deth dret a decidir deth pòble de Catalonha (tram. 250-00060/10), presentada peth Grop Parlamentari de Convergència i Unió e peth Grop Parlamentari d'Esquerra Republicana de Catalunya (reg. 858), e es esmendaments presentats peth Grop Parlamentari deth Partit Popular de Catalunya (reg. 1010), peth Grop Parlamentari de Convergència i Unió, eth Grop Parlamentari d'Esquerra Republicana de Catalunya e eth Grop Parlamentari d'Iniciativa per Catalunya Verds - Esquerra Unida i Alternativa (reg. 1011) e peth Grop Parlamentari Socialista (reg. 1012), e dera Prepausa de resolució sus eth dret a decidir e era reforma dera Constitucion (tram. 250-00062/10), presentada peth Grop Parlamentari Socialista (reg. 861), e es esmendaments presentats peth Grop Parlamentari deth Partit Popular de Catalunya (reg. 1010).

Finaument, d'acòrd damb er article 146 deth Reglament, a adoptat era següenta

Resolució

Preambul

Eth pòble de Catalonha, ath long dera sua istòria, a manifestat democraticaments era voluntat d'autogovernar-se, damb er objectiu de millorar eth progrès, era benestança e era egalitat d'oportunitats de toti es ciutadans, e de refortilhar era cultura pròpia e era identitat collectiva.

Er autogovèrn de Catalonha se fundamente tanben enes drets istorics deth pòble catalan, enes sues institucions seculares e ena tradicion juridica



PARLAMENT DE CATALUNYA

catalana. Eth parlamentarisme catalan a es sòns fondaments ena edat mieja, damb es assembleades de Patz e Trèva e era Cort Comtau.

En sègle XIV se creèc era Deputacion deth Generau, o Generalitat, qu'aqueric mès autonomia enquia qu'arribèc a actuar, pendent es sègles XVI e XVII, coma govèrn deth Principat de Catalonha. Era queiguda de Barcelona en 1714, a conseqüència dera Guèrra de Succession, comportèc que Felip V abolisse damb eth Decrèt de Naua Planta eth dret public catalan e es institucions d'autogovèrn.

Aquest itinerari istoric a estat compartit damb d'auti territòris, hèt qu'a configurat un espaci comun lingüistic, culturau, sociau e economic, damb vocacion de refortilhar-se e promòir-se a compdar dera reconeishença mutuau.

Pendent tot eth sègle XX era voluntat d'autogovernar-se des catalanes e es catalans a estat constanta. Era creacion dera Mancomunitat de Catalonha en 1914 siguec un primèr pas ena recuperacion der autogovèrn, abolit pera dictadura de Primo de Rivera. Damb era proclamacion dera Dusau Republica Espanhòla, en 1931, se constituïc un govèrn catalan, damb eth nòm de *Generalitat de Catalonha*, que se dotèc d'un estatut d'autonomia.

Era Generalitat siguec abolida en 1939 peth generau Franco, qu'instaurèc un regim dictatoriau que durèc enquia 1975. Era dictadura auec ua resistència activa deth pòble e eth Govèrn de Catalonha. Ua des hites dera luta pera libertat ei era creacion dera Assemblada de Catalonha en 1971, abans dera recuperacion dera Generalitat, damb caractèr provisionau, damb eth retorn en 1977 deth sòn president en exili. Ena transicion democratica, e en contèxte deth nau sistèma autonomic definit pera Constitucion espanhòla de 1978, eth pòble de Catalonha aprovèc en referendum er Estatut d'autonomia de Catalonha en 1979 e celebrèc es primères eleccions en Parlament de Catalonha en 1980.

Es darrèri ans, ena via der apregondiment democratic, ua majoria des fòrces politiquas e sociaus catalanes an impulsat mesures de transformacion deth marc politic e juridic. Era mès recenta se concretèc en procès de reforma der Estatut d'autonomia de Catalonha iniciat peth Parlament en 2005. Es dificultats e negatives per part des institucions der Estat espanhòu, qu'entre eres cau destacar era Sentència deth Tribunau Constitucionau 31/2010, compòrten un arrefús radica dera evolucion democratica des voluntats collectives deth pòble catalan laguens der Estat espanhòu e creen es bases entà ua involucion en autogovèrn, qu'aué s'exprimís damb totau claretat enes aspèctes politics, competenciaus, financèrs, sociaus, culturaus e lingüistics.

Eth pòble de Catalonha a exprimit de diuèrses manèras era voluntat de superar era actuau situacion de blocatge laguens der Estat espanhòu. Es manifestacions massives deth 10 de junhsèga de 2010, damb eth lèma «Èm ua nacion. Nosati decidim», e der 11 de seteme de 2012, damb eth lèma «Catalonha, nau estat d'Euròpa», son expression der arrefús des ciutadans envèrs era manca de respècte des decisions deth pòble de Catalonha.



PARLAMENT DE CATALUNYA

Eth 27 de seteme de 2012, per miei dera Resolucion 742/IX, eth Parlament constatèc eth besonh qu'eth pòble de Catalonha podesse determinar liuraments e democraticaments eth sòn futur collectiu mejançant ua consulta. Es darrères eleccions ath Parlament de Catalonha, eth 25 de noveme de 2012, exprimiren e confirmèren aguesta voluntat de manèra clara e indobtabla.

Entà amiar a tèrme aquest procès, eth Parlament de Catalonha, amassat ar inici dera detzau legislatura, en representacion dera voluntat des ciutadans de Catalonha exprimida democraticaments enes darrères eleccions, apròve era següenta:

DECLARACION DE SOBEIRANETAT E DETH DRET A DECIDIR DETH PÒBLE DE CATALONHA

D'acòrd damb era voluntat majoritària exprimida democraticaments peth pòble de Catalonha, eth Parlament de Catalonha acòrde iniciar eth procès entà hèr efectiu er exercici deth dret a decidir entà qu'es ciutadans e es ciutadanes de Catalonha poguen decidir eth sòn futur politic collectiu, d'acòrd damb es principis següents:

Prumèr. *Sobeiranetat*. Eth pòble de Catalonha a, per arrasons de legitimitat democratica, caractèr de subjècte politic e juridic sobeiran.

Dusau. *Legitimitat democratica*. Eth procès der exercici deth dret a decidir serà escrupolosament democratic e garantirà eseciaument era pluralitat e eth respècte de totes es opcions, mejançant era deliberacion e eth dialòg en sen dera societat catalana, damb er objectiu qu'eth prononciament que ne resulte sigue era expression majoritària dera voluntat populara, que serà eth garant fundamentau deth dret a decidir.

Tresau. *Transparéncia*. Se facilitaràn toti es estruments de besonh entà qu'er ensemble dera poblacion e era societat civiu catalana age tota era informacion e era coneishença adaptada entà exercir eth dret a decidir entà que se promòigue era sua participacion en procès.

Quatau. *Dialòg*. Se dialogarà e se negociarà damb er Estat espanhòu, damb es institucions europèes e damb er ensemble dera comunitat internacionau.

Cincau. *Coesion sociau*. Se garantirà era coesion sociau e territoriau deth país e era voluntat exprimida fòrça còps pera societat catalana de mantier Catalonha coma un solet pòble.

Siesau. *Europeïsme*. Se defeneràn e se promoiràn es principis constitutius dera Union Europèa, particularaments es drets fundamentaus des ciutadans, era democràcia, eth compromís damb er estat deth benèster era solidaritat entre es diferenti pòbles d'Euròpa e era escomesa peth progrès economic, sociau e culturau.



PARLAMENT DE CATALUNYA

Setau. *Legalitat*. S'utilizaràn toti es marcs legaus existents entà hèr efectiu er enfortiment democratic e er exercici deth dret a decidir.

Uetau. *Ròtle principau deth Parlament*. Eth Parlament, coma institucion que represente eth pòble de Catalonha, a un ròtle principau en aquest procès e, donques, s'an d'acordar e concretar es mecanismes e es dinamiques de trabalh que garantisquen aquest principi.

Nauau. *Participacion*. Eth Parlament de Catalonha e eth Govèrn dera Generalitat an de hèr participants actius de tot aquest procès ath mon locau e ath maxim de fòrces politiquas, d'agents economics e sociaus e d'entitats culturaus e civiques de Catalonha, e an de concretar es mecanismes que garantisquen aquest principi.

Eth Parlament de Catalonha encoratge toti es ciutadans e ciutadanes a èster protagonistes actius deth procès democratic der exercici deth dret a decidir deth pòble de Catalonha.

Palai deth Parlament, 23 de gèr de 2013

Eth secretari quatau
David Companyon i Costa

Era presidenta deth Parlament
Núria de Gispert i Català